



册府元龟

卷之八百四十三  
至四十四



13  
849  
274





門 4 3  
號 849  
卷 274



册府元龜

淮南李嗣京叅明

西極文翔鳳訂正

豫章黃國琦較釋

總錄部

八百四十三

知人第二

晉劉寔初為宣帝相國叅軍時鍾會鄧艾之伐蜀也  
有客問寔曰二將其平蜀乎寔曰破蜀必矣而皆不  
還客問其故笑而不答竟如其言寔之先見多此類  
也懷帝時為太尉

册府元龜

總錄部

卷之八百四十三



趙元儒名爲知人爲鄴市長石苞少爲史被使到鄴  
事久未決乃販鐵於鄴市元儒見苞異之因與結交  
歎苞遠量當至公輔繇是知名

許允爲吏部郎石苞嘗見允求爲小縣允謂苞曰卿  
是我輩人當相引在朝廷何欲小縣乎苞還歎息不  
意允之知己乃如此

孫登高尚不仕稽康從之游登謂康曰子才多識寡  
難乎免於今之世矣

一云君性烈而才高其能免乎

子無求乎康不

能用果遭非命仍作幽憤詩曰昔慙柳下今愧孫登  
潘岳爲黃門郎熊翹嘗爲石崇蒼頭而性廉直有士

風岳見而稱異勸崇免之乃還鄉里

胡毋輔之字彥國爲湘州刺史初光逸爲門亭長迎  
新令至京師輔之與荀遠共詣令家望見逸輔之謂  
遠曰彼似奇才便呼上車與談良久果俊器

阮修字宣子梁國張偉志趣不嘗自隱於屠釣修愛  
其才美而知其不真偉後爲黃門郎陳留內史果以  
世事受累修爲太子洗馬

郭奕字大業爲野王令牟祐字叔子祐嘗過之奕歎  
曰牟叔子何必減郭大業少選復往又歎曰牟叔子  
去人遠矣遂送祐出界數百里坐此免官

一云牟祐舉上計吏



州四辟從事秀才五府交命皆不就奕見之曰此今之顏子者也  
 奕後為雍州刺史  
 亭長李含俊才而門寒為豪族所排奕用為別駕  
 含後果有名位時以奕為知人奕遷尚書名重當世  
 朝臣皆出其下時帝委任楊駿奕表駿小器不可任  
 以社稷帝不聽駿後果誅

鄭袤為儀同三司初年十七在鄉里時濟陰魏諷為  
 相國掾名重當世袤同郡任覽與結交袤以諷姦雄  
 終必為禍勸覽遠之及諷敗論者稱焉  
 張華為司空初陶侃至雒陽數詣華華初以遠人不  
 甚接遇侃每往神無忤色華後與語共之除郎中伏

波將軍

裴楷字叔則為開府儀同三司有知人之鑒初在府  
 南樂廣僑居郭界未知名楷一見而奇之致之於宰

府

裴頠

魚毀切

字逸民王接性簡率不修俗操鄉里大族

多不能善之惟頠雅知焉頠為左僕射嵇紹為汝陰  
 太守頠深器之每日使延祖為吏部尚書可使天下  
 無復遺才矣頠後為侍中

李熹薦樂安孫璞亦以道德顯時人稱為知人熹官  
 至特進



閻德東海人也唐彬初受學於德門徒甚多獨目彬有廊廟才後拜使持節前將軍領西戎較尉雍州刺史及彬官成而德已卒乃爲之立碑

左父太原人也魏舒少質樸性好騎射著韋衣入山澤以漁獵爲事惟父謂舒曰卿終當爲台輔然未能令妻子免饑寒吾當助卿營之嘗賑其匱乏嘗受而不辭果位同三司祿賜如前几杖不朝賜錢百萬山濤字巨源爲尚書僕射初王衍總角造濤濤嗟歎良从旣去目而送之曰何物老嫗生寧馨兒然誤天下蒼生者未必非此人也

王戎爲司徒衍從兄也初孫秀爲瑯琊郡吏求品於鄉議衍將不許戎勸品之及得志朝士有宿怨者皆被誅而戎衍獲免焉

范晔爲少府卿人郭舒幼請其母從師歲餘便歸精識大義晔及舒宗人武陵太守郭景威稱舒當爲後來之秀終成國器

盧欽范陽涿人也爲尚書僕射初同郡人張華少孤貧自教欽見而器之鄉人劉放亦奇其才以女妻焉稽紹爲侍中初沛國戴晞少有才知與紹從子舍相友善時人許以遠致紹以爲必不成晞後爲司州



主簿以無行被斥州黨稱紹有知人之明又元帝初封瑯琊王幼有令聞及惠皇之際王室多故帝每恭儉退讓以免於禍沉敏有度量不顯灼然之迹故時人未之識焉惟紹異之謂人曰瑯琊王毛骨非嘗殆非人臣之相也

劉公榮濟陰人也有知人之鑒范喬弱冠受業於樂安蔣國明公榮見喬深相器重喬父沒足不出邑里供養衡門至於白首元康中除樂安令辭疾不拜喬凡一舉孝廉八薦公府再舉清白又舉寒素一無所就又同郡武陟字元夏父周魏衛尉陟沈敏有器量

早獲時譽與二弟紹字叔夏茂字季夏金總角知名雖諸父兄弟及鄉閭宿望莫能覺其優劣公榮有知人之鑒嘗造周周見三子焉公榮曰皆國士也元夏最優有輔佐之才陳力就列可爲亞公叔夏季夏不減嘗伯納言也

江統有才識東海王越爲兗州牧以統爲別駕委以州事與統書曰昔王子師爲豫州未下車辟荀慈明下車辟孔文舉貴州人士有堪應此者不統舉高平郗鑒爲賢良陳留阮修爲直言濟北程收爲方正時以爲知人統累遷至黃門侍郎散騎嘗侍領國子博



士 山簡河內人爲征南將軍鎮襄陽初蔡克未仕時簡嘗與瑯邪王衍書曰蔡子尼今之正人衍以書示衆曰山子以一字拔人然未易可稱後衍聞克在選官曰山子正人之言驗於今矣

潘京武陵漢壽人也爲泉陵令初同郡人戴若思除泚水令不就遂往武陵省父時京素有理鑒名知人其父遣若思就京與語旣而稱若思有公輔之才顧榮字彥先嘗見吳伏波將軍孫秀之曾孫晷爲兒童未嘗被呵怒謂其外祖薛兼曰此兒神明清審志

氣貞立非嘗童也榮位至散騎嘗侍安東軍同吳人周浚字開林爲安東將軍有人倫鑒識鄉人史曜素微賤衆所未知浚獨引之爲友遂以妹妻之曜竟有名於世張公陳留高士也王遵少有風鑒識量清遠年十四張公見而奇之謂其從兄敦曰此兒容貌志氣將相之器也賀循會稽山陰人也爲奉嘗雅有知人之鑒拔同郡楊方於卑陋卒成名於世周顛爲僕射初顧和幼爲王導揚州從事月旦當朝



未入停車門外顛遇之和方擇蠶夷然不動顛既過  
 顧指和心曰此中何所有和徐應曰此中最是難測  
 地顛入謂導曰卿州吏中有一令僕才導亦以為然  
 王澄為荊州刺史范汪父稚早卒汪少孤貧六歲過  
 江依外家新野庾氏澄見而奇之曰與范族者必是  
 子也

王應王敦兄舍子也敦養應為子敦從弟彬為江州  
 刺史舒為荊州刺史敦死舍欲投舒應勸舍投彬舍  
 曰大將軍平素與江州云何為敦嘗欲汝欲歸之應  
 曰此乃所以宜往也江州當人強盛時能立同異及

人危厄必興愍惻荊州守文豈能意外行事舍不從  
 遂共投舒舒果沈舍父子於江彬聞應來密具船以  
 待之既不至深以為憾

王導字茂弘為丞相初諸葛恢弱冠知名值天下大  
 亂避地江左各亞王導庾亮導嘗謂曰明府當為黑  
 頭公及導拜司空恢在坐導指冠謂曰君當復著此  
 恢後累遷尚書右僕射尚書令加侍中金紫光祿大  
 大夫劉惔少清遠有奇操與母任氏寓居京口家貧  
 織芒屨以為養雖葦門陋巷晏如也人未之識惟導  
 深器之後稍知名論者比之袁羊惔喜還告其母其



母聰明婦人也謂之曰此非汝比勿受之又方之  
范汪者恢復喜母又不聽及恢年德轉升論者遂比  
之荀彧

劉惔為丹陽尹嘗薦吳郡張憑憑卒為美士眾以此  
服其知人又桓溫豪爽有風槩姿貌甚偉面有七星  
少與惔善惔嘗稱之曰溫眼如紫石稜鬚作蠟毛傑  
孫仲謀晉宣王之流亞也

潘滔為洗馬見王敦而目之曰處仲敦蜂目已露但

豺聲未振若不噬人亦當為人噬東海王越以敦為

揚州刺史滔說越曰今樹處仲於江外使其肆豪強

之心是見賊也越不從元帝以為都督江揚荆湘在

廣六州軍事明帝即位敦遂叛

庾亮領江州孟嘉少知名亮辟補廬陵從事嘉還都

亮引問風俗得失對曰還轉當問吏亮舉麈尾掩口

而笑謂第曰孟嘉故是盛德人轉勸學從事

褚裒為豫章太守正旦朝庾亮以裒有器識亮大會

州府人士孟嘉坐次甚遠裒問亮聞江州有孟嘉其

人何在亮曰在坐卿但自覓裒歷觀指嘉謂亮曰此

君小異將無是乎亮欣然而笑喜裒得嘉

謝安字安石為太傅初褚爽少有令稱安甚重之嘗



曰若期生

爽之小字

不佳我不復論士矣

萬嗣為長沙太守時陶侃為廬江太守張夔督郵領  
攬陽令有能名遷主簿嗣過廬江見侃虚心敬悅曰  
君終當有大名命其子與之結友而去夔察侃為孝

廉

楊暉為豫章國郎中令暉陶侃州里也為鄉論所歸  
侃謂之暉曰易稱貞固足以幹事陶士行是也與同  
乘見中書郎顧榮榮甚奇之吏部郎溫雅謂暉曰奈  
何與小人共載暉曰此人非凡器也

黃慶為武庫令尚書樂廣欲會荆揚士慶進陶侃於

廣人或非之慶曰此子終當遠致復何疑也慶後為

史典侃補武岡令

劉弘為荊州刺史將之官辟陶侃為南蠻長史遣先

向襄陽討賊張昌破之弘既至謂侃曰吾昔為爭公

叅軍謂吾其後當居身處今相觀察必繼老夫矣後

以軍功封東鄉侯

桓彝字茂倫為西陽太守性通朗早獲盛名有人倫

識鑒拔才取士或出於無聞或得之孩抱時人方之

許郭初見謝安始三歲彝歎曰此兒風神秀徹後當

不減二泉



溫嶠爲驃騎將軍鎮武。初桓溫生未朞而嶠見之曰此兒有奇骨可試使啼及聞其聲曰真英物也遂以嶠所賞故遂名之曰溫嶠笑曰果爾後將易吾姓也

王蘊爲會稽內史時王悅來拜墓蘊于恭往省之素相善遂留十餘日方還蘊問其故恭曰與阿大語彈連不得歸蘊曰恐阿大非爾之友阿大悅小字也後竟乖初好時以爲知人  
庾翼字稚恭爲征南將軍少有經綸大畧京兆杜乂陳郡殷浩金才各冠世而翼弗之重也語人曰此輩

宜東之高閣候天下太平然後議其任矣見桓溫總角之中便期之以遠畧因言於成帝曰桓溫有英雄之才願陛下勿以嘗人遇之嘗壻畜之宜委以方召之任必有弘濟艱難之勳

王濛爲司徒左長史初謝安弱冠詣濛清言良久旣去濛子修日向客何如大人濛曰此客疊疊來逼人王導亦深器之繇是少有重名  
郗超爲桓溫參軍事聞謝安以苻堅之侵舉兄子玄爲將超雖素與玄不善聞而歎之曰安違衆舉親明也玄必不負舉才也時咸以爲不然超曰吾嘗與玄



共在桓公府見其使才雖履屐間亦得其任所以知之

桓溫字元子王珣弱冠與陳郡謝玄爲溫掾俱爲溫所敬重嘗謂之日謝掾年四十必擁旄杖節王掾當作黑頭公溫後爲丞相大司馬

王雅爲太子少傅孝武世時帝以會稽王道子無社稷器幹慮晏駕之後皇室傾危乃選時望以爲藩屏將擢王恭殷仲堪等先以訪雅雅以恭等無當世之才不可大任乃從容日王恭風神簡貴志氣方嚴旣居外戚之重當親賢之寄然其秉性峻隘無所苞容

執自是之操無守節之志仲堪雖謹於細行以文義著稱亦無弘量且幹畧不長若委以連率之重據形勝之地今四海無事足能守職若道不當隆必爲亂階矣帝以恭等爲當時秀望謂雅疾其勝已故不從二人皆被升用其後竟敗有識之士稱其知人

王胡之爲郡太守時南平車武子父育爲郡主簿胡之名知人見武子於童幼之中謂武子父日此兒當大興卿門可使專學

王謐見劉裕在布衣衆未之識也惟謐獨奇貴之嘗謂裕日卿當爲一代英雄及裕破桓玄謐以本官加



侍中領揚州刺史錄尚書事

桓玄字敬道爲大司馬初京兆霸城人王修南渡見玄玄知之謂曰君平世吏部郎才又謝景仁以不附會司馬元顯年三十方爲著作郎玄誅元顯見景仁甚知之謂四坐司馬庶人父子云何不敗遂令謝景仁方作著作郎

楊珧駿之弟也魏咸熙中劉元海爲任子在維陽晉文帝深待之泰始之後王暉又屢言之於武帝帝召與語大悅之謂王濟曰劉元海容儀機鑿雖繇余日禪無以加也濟對曰元海容儀機識實如聖旨然其

文武才幹賢於二子遠矣陛下若任之以東南之事吳會不足平也帝稱善珧及孔恂進曰臣觀元海之才當今懼無其比陛下若輕其衆不足以成事若假之威權平吳之後恐其不復北渡也非我族類其心必異任之以本部臣竊爲陛下寒心若舉天阻之固以資之無乃不可乎帝默然後秦涼覆沒帝疇咨將帥上黨李熹曰陛下誠能發匈奴五部之衆假元海一將軍之號鼓行而西可指期而定恂曰李公之言未盡殄患之理也熹勃然曰以匈奴之勁悍元海之驍兵奉宣聖威何不盡之有恂曰元海若能平涼州



漸樹機能恐涼州方有難耳蛟龍得雲雨非復池中物也帝乃止珽官終太僕

董仲道隱者也王彌有才幹博涉書記少游俠京都仲道見而謂之曰君豺聲豹視好亂樂禍若天下騷擾不作士大夫矣彌後事劉元海劉曜爲石勒所殺張華仕前燕爲安北將軍雅有知人之鑒慕容廆童冠時往謁之華甚歎異謂曰君至長必爲命世之器扶難濟時者也因以所服簪纓遺廆結殷勤而別張載灌津人也同郡韓嘗少能屬文師事載載奇之曰王佐才也嘗後仕慕容儁爲揚烈將軍與李產俱

傳東宮從太子曄入朝儁顧謂左右曰此二傳一傳偉人未易繼也其兄重如此

苻宏前秦苻堅之太子也堅以士馬強盛有圖西域之志乃授呂光使持節都督西討諸軍事率將軍姜飛彭馬杜進康盛等總兵十萬鐵騎五千以討西域以隴西董方馮翼郭抱武威賈虔弘農楊穎爲四府佐將宏執光手曰君器相非嘗必有大福宜深保愛毛興仕前秦鎔上邽時苻登兄同成爲典長史以登爲司馬後姚萇作亂遣其弟碩德率衆伐興相持久之興將死告同成曰與卿累年共擊逆羗事終不尅



何憾之深可以後事付卿少弟司馬矜碩德者必此人也卿可總攝司馬事

徐統見王猛於鄴都奇之召為功曹遁而不應

王猛字景畧為苻堅丞相呂光沈毅凝重寬簡有大  
量喜怒不形於色時人莫之識也惟猛異之曰此非  
嘗人也

劉化者道術之士也見李特第三子雄化每謂人曰  
關隴之士皆當南移李氏子中惟仲雋有奇表終為

人主 仲雋雄  
字也

趙廞後蜀人也李庠特第三弟也為威寇將軍封陽

泉亭侯初至蜀廞深器之與論兵法無不稱善每謂

所親曰李玄序蓋亦一時之關張也 玄序  
庠字

王齊北燕人初馮素弗拔之長弟任俠放蕩不修小  
節故時人未之奇惟齊異焉曰撥亂才也及為宰輔  
謙虛恭慎非禮勿動成藻為南宮令馮素弗弱冠自  
請慕容熙尚書左丞韓業請婚業怒而距之復求尚  
書郎高邵女邵亦弗許時藻豪俊有高名素弗造焉  
藻命門者勿納素弗逕入與藻對坐旁若無人談飲  
連日藻始奇之曰吾遠求騏驎不知近在東鄰何識  
子之晚也當世俠士莫不歸



宋謝景仁為桓玄黃門侍郎時可祖為桓循撫中兵  
 參軍嘗詣景仁諮事景仁與語悅之因留高祖共食  
 未辨而景仁為玄所召玄性促急俄頃之間騎詔續  
 至高祖屢求去景仁不許口主上見待要應有方我  
 欲與客共食豈當不得待竟安坐飽食然後應召高  
 祖甚感之

江敞為建武將軍初劉穆之世居京口少好書傳博  
 覽多通為敞所知及敞為將軍以穆之為府主簿  
 謝混字叔源高祖義旗初建以徐羨之為鏖軍參軍  
 尚書庫部郎領軍司馬與混共事混甚知之混官終

左僕射

蔡堪之見謝安兄弟謂人曰弘微貌類中郎而性似

文靖 弘微謝  
密字也

沈慶之為建威將軍元嘉三十年元凶弒立孝武入  
 謝義興太守王僧達歸孝武孝武命為長史初發尋  
 陽慶之謂人曰王僧達必求赴義人間其所以慶之  
 日虜馬飲江王出赴難見其議論開張執意明決以  
 此言之其至必也僧達果來

桓序為輔國將軍劉敬宣父宰之為鎮北將軍敬宣  
 八歲喪母晝夜號泣中表異之序鎮蕪湖宰之參序



軍事四月八日敬宣見眾人灌佛乃下頭上金鏡以爲母灌像因悲泣不自勝序歎息謂牢之曰卿此兒既爲家之孝子必爲國之忠臣

劉敬宣以劉毅爲寧朔參軍時人或以雄傑許之敬宣曰非嘗人之才當別有調度豈得便謂此君爲人豪耶然其性外寬而內忌自伐而尚人若一旦遭逢亦當以陵上取禍耳

韓伯爲豫將太守胡藩少孤居喪以毀稱伯見謂藩叔尚書少廣曰卿此姪當以義烈成名

雷次宗字仲倫豫章南昌人元嘉二十五年徵至京

師開館車駕數幸除給事中不就南齊衡陽元王道度太子長兄也與太祖俱受學於次宗宣帝問二兒學業次宗答曰其兄外朗其弟內潤皆良璞也

張邵拜征虜將軍領寧蠻校尉雍州刺史加都督時王華爲侍中護軍初華與邵有隙及華參要親舊爲之危心邵曰子陵華之字也方弘至公必不以私讐害正

義是任也華實舉之曰靈戰國自蕭增立王劉柳爲尚書僕射沈演之年十一柳見而知之曰此童終爲令器

王韶之爲吳興太守郡人王道隆兄道迄涉學善書



形貌又美韶之謂人曰有子弟如王道迄無所少  
荀伯子潁川人卒於東陽太守王惠素不與謝靈運  
相識嘗得交言靈運辨博辭義鋒起惠時然後言時  
伯子在座退而告人曰靈運固白蕭散直上王郎有  
如萬頃波焉

劉穆之為丹陽尹謝方明性嚴格與從兄混俱有重  
名惟歲節朝宗而已穆之權重當時朝野輻輳不與  
穆之相識者惟有混方明都僧施蔡廓四人而已穆  
之甚以為憾方明廓後往造之大悅白高祖曰謝方  
明可謂名家駒直置便自是台鼎人無論復有才用

南齊蕭摹之為丹陽尹時高帝父承之少有大志  
力過人摹之及宗人北兗州刺史源之並見知重

張緒為會稽內史陸慧曉清介正立不雜交遊緒見  
慧曉童幼便嘉異之稱之曰江東裴樂也

張環為吳郡太守郡人顧暲陸閑金少年未知各環  
並引為綱紀後並立名世以為知人

虞綜會稽餘姚人初見武帝帝始為從官家尚貧薄  
綜數相分遺每行必呼帝同載帝甚德之卒於光祿

大夫加正員嘗侍  
曹武為散騎嘗侍武雖武士頗有知人鑒梁武及崔



惠景之在襄陽於時崔方貴盛武性儉嗇無所餉遺獨謂梁武曰卿必大貴我當不及見今以弱子相託每密送錢物并好馬時帝在戎多乏就武換借未嘗不得遂至十七萬及帝卽位忘其惠天監二年帝忽夢如田胙下行兩邊水深無底夢中甚懼忽見曹武來負武帝得過曰卿今爲天下主乃爾忘我顧託之言耶我兒饑寒無依昔所換十萬可還其市宅帝覺卽使主書送錢還之使用市宅子世澄世宗金蒙抽擢三二年間迭爲大郡

明諧之爲衛尉領中庶子諧之有識計每朝廷官缺

及應遷代密量上所用人皆如言

褚淵爲錄尚書事從弟炫少清簡爲從舅王景文所

知淵謂人曰從弟廣信獨立乃十倍於我也

張融吳郡錢塘人與杜栖同郡栖徵士京產之子也

融與京產相友每相造言論栖嘗在側融指樛曰昔

陳太丘之名元方此之爲劣今方古人何貴融後終

於司徒左長史

殷灊爲尚書右丞沈瑀嘗詣灊灊與語及政事甚器

之謂曰觀卿才幹當居吾此職

蕭惠開征西將軍思話之子也丹陽建康人紀僧真



少隨思話及惠開皆被賞遇惠開性苛僧真以微過見罰既而委任如舊及惠開罷益州還都不得志而僧真事之愈謹惠開臨終歎曰犯僧真方當富貴我不見也

沈寅之爲領軍丘靈鞠吳興烏程人也靈鞠少好學善屬文州辟從事寅之寅之曰身昔爲州職詣領軍謝晦賓主坐處正如今日卿將來或復此

劉藏爲尚書左丞徐孝嗣始適藏弟舍孝嗣往詣藏藏退語舍曰徐郎是令僕人三十餘可知矣汝宜善自結

陸修靜與張融同郡融弱冠修靜以白鷺羽扇塵尾遺融曰此旣異物以奉異人融後爲黃門郎太子中

庶子

王儉爲衛軍武帝起家巴陵王南中郎法曹行參軍遷儉東閣祭酒儉一見深相器異謂廬江何憲曰此蕭郎三十內當作侍中出此則貴不可言又稱徐勉有宰輔之量

王融爲中書郎劉孝綽之舅也孝綽幼聰敏七歲能屬文融深賞異之嘗與同載適親友號曰神童融每言曰天下文章若無我當歸阿士阿士孝綽小字也



梁劉孝綽父繪齊世掌詔誥孝綽年未志學繪嘗使代草之父黨沈約任昉范雲等聞其名命駕先造焉昉尤相賞好范雲年長繪十餘歲其子孝才與孝綽年十四五及雲遇孝綽便申伯季乃命孝才拜之後累遷秘書監

紀少瑜早孤幼有志節嘗慕王安期之為人年十三能屬文初爲京華樂王僧孺見而賞之曰此子才藻新拔方有高名後爲武陵王記室參軍

呂道惠餘杭人范述曾幼好學從道惠受五經畧通章句道惠學徒嘗有百數獨稱述曾曰此子必爲王者師齊文惠太子竟陵文宣王幼時高帝引述曾爲之師友

蔡樽爲侍中武帝嘗問曰鄉門舊尚有堪事者多少樽曰臣門客沈約范岫久已被升擢此外無人約時爲太子少傅岫爲右將軍

張永顧協之外從祖也協字正禮吳郡吳人幼孤隨母養於永永嘗攜內外孫姪遊虎丘山協年數歲永撫之曰兒何戲協對曰正欲枕石漱流永歎息曰顧氏興於此子後爲散騎嘗侍鴻臚卿

顧歡未异外祖也异年數歲歡撫之謂异祖昭之曰



此兒非嘗器當成卿門戶後爲中領軍贈侍中尚書右僕射

梁仲德張緬外祖也緬字元長車騎將軍弘策子也年數歲仲德異之嘗曰此兒非嘗器非止爲張氏寶方爲海內令名也仕至侍中  
裴子野河東人爲鴻臚卿張纘爲太尉諮議參軍尚書吏部俄爲長史兼侍中時人以其早達子野曰張吏部有喉唇之任已憾其晚矣  
阮孝緒謝朓舅也朓晉太傅安八世孫孝緒以其行至性謂之曾子稍授以經史過目便能諷誦孝緒每

曰吾家數世也朓後遷散騎嘗侍

張岱陸倕外祖也倕少勤學爲岱所異岱嘗謂諸子曰此兒汝家之元陽也終於太嘗卿  
陸閑字遐業有風槩與人交不苟合少爲同郡張緒所知仕至揚州別駕  
袁炤范雲之親人也雲字彥龍嘗就炤學晝夜不怠炤撫其背曰卿精神秀朗而勤於學卿相才也雲後爲尚書右僕射  
袁粲爲衛將軍謝朓爲粲長史粲性簡峻罕通賓客時人方之李膺朓謁旣退粲曰謝令不死朓莊之子



也

韋叡以齊末多故不欲遠鄉里求爲上庸太守加建威將軍俄而太尉陳顯達護軍將軍崔慧景頻逼京師民心惶駭未有所定西士人謀之於叡叡曰陳雖舊將非命世才崔頗更事儒而不武其取赤族也宜哉天下貞人殆興於吾州矣乃遣其二子自結於高祖

沈約爲左衛將軍張率爲太子舍人與同郡陸倕互相友狎嘗同載詣約適值任昉在焉約乃謂昉曰此二子後進才秀皆南金也卿可與定交繇此與昉友

善

袁顛爲雍州刺史傅昭幼孤爲外祖所養十歲於朱雀航賣曆日顛嘗來昭所昭讀書自若神色不改顛歎曰此兒神情不凡必成佳器昭後爲散騎嘗侍金紫光祿大夫

謝朓文章盛於一時到洽清警有學行朓見洽深相賞好目引與談論每謂洽曰君非直名人亦乃兼資文武朓後爲吏部洽去職朓欲薦之洽觀世亂深相拒絕

任昉樂安人時到洽除晉安王國左嘗侍不就遂築



室巖阿幽居者積歲昉有知人鑒與洽兄沼漑並游  
嘗訪洽於田舍見之歎曰此子日下無雙遂申拜親  
之禮又伏挺有才思好屬文爲五言詩善效謝康樂  
體昉深相歎異嘗曰此子日下無雙

何顥字子晉徵侍中不就杜栖有學業能清言顥見  
栖歎曰卿風韻如此雖獲嘉譽不永年矣栖果早卒  
又知丘遲於幼童稱江淹於寒素悉如其言

徐勉爲中兵郎領軍長史耶耶王元長才名甚盛嘗  
欲與勉相識每託人召之勉謂人曰王郎名高望促  
難可輕幣衣裙俄師元長及禍時人莫不服其識鑒

後勉爲僕射時蔡大寶濟陽考陽人少孤而篤學不  
倦善屬文初以明經對策第一解褐武陵王國左嘗  
侍嘗以書于勉大爲勉所賞異乃令與其子游處所  
有墳籍盡以給之遂博覽群書學無不綜  
諸葛璩瑯邪人臧盾幼從璩受五經通章句璩學徒  
嘗有數十百人看處其間無所狎比璩異之歎曰此  
生重器也佐才也盾後爲領軍將軍  
明僧紹徵士也劉杳字仲深年數歲僧紹見之撫而  
言曰此兒實千里之駒杳後遷尚書左丞  
趙伯符孫謙親人也謙字長遜東莞莒人也少爲伯



符所知猶年十七伯符爲豫州刺史引爲左軍以幹

稱

周顒汝南人何喬縱情誕節時人未知之也惟劉瓛  
顒深器異之後累遷左丞尚書領驍騎中書令拜表  
辭職居若耶山高祖踐祚詔爲特進右光祿大夫不  
就

蔡大寶有重名於江左柳莊初爲太府卿少有遠量  
博覽墳籍兼善辭令大寶時爲岳陽王蕭譽諮議見  
莊便歎曰襄陽水鏡復在於茲矣大寶遂以女妻之  
王僧辨爲申隨都督司馬申爲鎮西外兵記室參軍

及侯景寇郢州僧辨據巴陵每進籌策皆見行用僧  
辨歎曰此生腰鞬汗馬或非所長若使撫衆守城必  
有奇績

陳孔奐爲中書令虞世基幼沈靜喜愠不形於色博  
學有高才兼善艸隸奐見而歎曰南金之貴屬在斯  
人及煬帝卽位叅掌朝政而世基于水大世基爲  
蕭暎爲吳興太守梁大同初嘗目高祖謂僚佐曰此  
人方將遠大  
鄧顯浦國人也孔奐會稽山陰人也奐數歲而孤爲  
叔父虔孫所養好學善屬文經史百家莫不通涉顯



時稱學府每共負討論深相歎服乃執兵手日昔伯  
嗜墳素悉與仲宣吾當希彼蔡君足下無愧王氏所  
保書籍尋以相付卒為散騎嘗侍金紫光祿大夫領  
前軍將軍

蕭勵江總之舅也總七歲而孤依于外氏幼聰敏有  
志性勵名重當時特所鍾愛嘗謂總曰爾行殊異神  
采英拔後之知名當出吾右後為尚書令給鼓吹一  
部

王筠為尚書謝貞從舅也貞年七歲母王氏授論語  
孝經讀訖便誦八歲嘗為春日閒居五言詩筠奇其

有佳致謂所親曰此兒方可大成至如風定花猶落  
乃追步謝惠連矣繇是名輩知之遷南平王友掌記  
室事加招遠將軍

張纘為吏部尚書杜之偉補邵陵王田曹參軍之偉  
年位甚卑特以彊識俊才頗有名當世纘深知之以  
為廊廟器也

徐陵為少傅聞虞世基名召之世基不往後因公會  
陵一見而奇之顧謂朝士曰當今潘陸也因以弟女  
妻焉

後魏劉庫仁初見道武疑然不群嘗謂其子曰有圖



天下之志興復洪業光揚祖宗者必此主也

劉羅辰代人宣穆皇后之兄也父春爲北部大人帥部落歸國羅辰有智謀謂春日從兄顯忍人也願早圖之春不以爲意後顯果殺春而代立

王猛北海人爲苻堅相薛強字威明幼有大志懷軍國籌畧與猛同志友善及桓溫入關中猛以巾褐謁之溫曰江東無卿比也秦國定多奇士如生輩尚有幾人吾欲與之俱南猛曰公求可與撥亂濟時者友人薛威問其人也溫曰聞之久矣方致朝命強聞之自南山來謁與猛皆署軍祭酒強察溫有大志而無

成功乃勸猛止俄而溫敗及苻堅立猛見委任其

陽公融爲書將以車馬聘強猛以爲不可屈乃

崔光爲司徒元子孝字季業早有令譽年八歲光見而異之曰後生領袖必此人也又濟南王彧臨淮王之孫也彧字文若少有才學當時甚美光見而謂之曰黑頭三公當此人也又元顯和少有節操歷司徒記室叅軍光每見之曰元叅軍風流清秀容止閑雅乃宰相之器又趙彥深年十歲曾候光光謂賓客古人觀隸子以知人此人當必遠至

游肇爲侍中臨淮王昌弟孚少有令譽肇及并州刺



史高聰司徒崔光等見孚咸曰此子當進的人物憾吾徒衰暮不及見耳

李孝伯為尚書宋孝武鎮彭城魏使孝伯至帝遣長史張暢與語而帝改服觀之孝伯目帝不輟及出言人曰張侯側有人風骨視瞻非嘗士也

郝軒太原人世名知人崔玄伯為著作佐郎持丕牧冀州為征東功曹軒稱玄伯有王佐之才近代所未有也

李彪為御史中尉以李煥有幹用少與酈道元俱為彪所知

崔浩為司徒薛拔沉毅有器識年始弱冠浩見而奇之

張讜為平壽侯李訢為相州刺史以罪免配為廝役讜見與語奇之謂人曰此佳士也終不久屈未幾而復為太倉尚書攝南部事

崔玄伯清河人卒贈司空初高允少孤夙成有奇度玄伯見而異之歎曰高子黃中內潤文明外炤必一代偉器但吾恐不見耳

崔挺為北海王司馬初崔光之在貧賤也挺贍遺衣食嘗親敬焉又識邢巒宋弁於童稚之中並謂終當



遠至世稱其知人後光位至司徒侍中

李冲爲尚書宋弁才學雋贍少有美名高祖初曾至京師見冲因言論移日冲竦然異之退而言曰此人一日千里王佐才也又崔亮年十歲嘗依季父幼孫家貧傭書自業時冲當朝任事亮從兄光往依之言亮於冲冲迎爲館客冲謂其兄子彥曰大崔生寬和篤雅汝宜友之小崔生峭整清徹汝宜敬之三人終將大至

李崇爲尚書令宋維字伯緒諂事元父爲時所忿崇與尚書左僕射郭祚右僕射游肇每云伯緒凶疎終敗宋氏幸得殺身耳論者以爲有徵後除營州刺史仍以本將軍靈太后反政以父黨除名遂還鄉里尋追其前誣告清河王事於鄴賜死

清河王暉爲太傅劉懋性沈雅厚重暉愛其風雅嘗目送之曰劉生堂堂縉紳領袖若天假之年必爲魏

朝宰輔

任城王澄爲吏部尚書裴夙爲主客郎時澄有知人鑒每歎美夙以遠大許之

李苗爲員外散騎嘗侍大保城陽王徽司徒臨淮王或重之二王頗或不穆苗諫之及徽寵勢隆極猜忌



彌甚苗謂人曰城陽蜂目先見豺聲今轉彰矣

崔衡嘗舉李元愷程駿等終爲名器世以是稱之

高允爲中書監祖瑩年十二爲中書學生尤好屬文  
允每日此子才器非諸生所及終當遠至後爲中書  
侍郎

李神雋爲吏部尚書崔彥穆幼明悟神彩卓然神雋  
有知人之鑒見而歎曰王佐才也後位至侍中

崔亮爲吏部侍郎邢邵字子才少時有避遂稱子才  
焉年五歲亮見而奇之曰此子後當大成位望通顯  
嘗景河內人爲儀同三司車騎將軍蘇亮字景順武

功人少通敏博學好屬文善章奏初舉秀才至雒陽  
遇景景深器之退而謂人曰秦中才學可以抗山者  
者將此人乎又溫子昇博覽百家文章清婉爲廣陽  
土深賤客在馬坊教諸奴子書作侯山祠堂碑文嘗  
景見而善之故詣深謝之景曰頃見溫生深怪問之  
景曰溫生是大才士深繇是稍知之

北齊段長遼西人神武素家貧及聘武明皇后始有  
馬得給鎮將長嘗奇神武貌謂曰君有康濟才終不  
徒然便以子孫爲託及貴追贈長司空擢其子寧而  
用之



蔡雋廣寧石門人高爽有膽畧高祖微時深相親附與遼西段長太原龐蒼鷹俱有先知之鑒

甄琛爲定州長史同郡杜弼幼聰敏琛簡試諸生見而策問義解閉明應答如響大爲琛所歎異其子寬與弼爲友州牧任城王澄聞而召問深相嗟賞許以王佐之才澄琛還雒稱之於朝丞相高陽王等多相召命

彭樂以斛律光初爲侯景部下樂謂高敖曹曰斛律家小兒不可三度將行後奪人名後至大將軍加大傳

邢邵河間人李繪儀貌端偉神情朗雋邵繪舅也與繪清言歎其高遠每稱曰若披雲霧如對珠玉宅相之寄良在此生後位至特進太嘗卿任城王潛以李德林器量沈深時人未能測惟潛及趙彥深魏收陸邛大相欽重延譽之言無所不及後位至內史令

元嶷爲刺史郎基任瀛州騎兵時陳康元爲司馬畢義雲爲屬與基並有聲譽爲嶷目曰三賢俱有當世才後來皆當遠至惟郎騎兵任真過甚恐不足自達陳畢後益貴顯而基位止郡守



邢子良與王晞遊處晞小名沙彌幼而孝謹淹雅有器度好學不倦美容儀有風則隨母兄東適海隅與子良愛其清悟與其在雒兩兄書曰賢弟彌郎意識深遠曠達不群簡於造次言必詣理吟詠性情必臻麗絕恐足下方難爲兄不暇慮其不進也

崔昂謂盧潛及弟士邃云此昆季足爲後生之俊但憾其俱不讀書耳

劉仁之爲彭城王韶定州長史孟業家本寒微爲州小吏性廉謹韶拜定州除典籤仁之謂業曰我處其外君居其內同心戮力庶有濟乎未幾仁之徵入爲

中書令臨路啓韶云殿下左右可信任者惟有孟業願專任之餘人不可信也又與業別執手曰今我出都君便失援恐君在後不自保全惟正與直願君自勉

徐遵明爲國子博士楊慶字伯悅美姿儀性辯慧年十六遵明見而異之  
楊遵彥爲尚書右僕射見奉朝請薛道衡嗟賞吏部尚書龐西辛術與語歎曰鄭公業不亡矣河東裴讞之曰自鼎遷河朔吾謂關西孔子罕值其人今復遇薛君矣



後周齊王憲嘗遇標譽之於途異而與語大奇之蹇時爲童兒因奏入國子以明經擢第拜宗師中士謝舉爲僕射標霞爲邵陵王府功曹頗協時論舉引霞與語甚嘉之顧謂人曰江漢英靈見於此矣

李賢幼有志節不妄舉動嘗出遊遇老人鬚眉皓白謂之曰我年八十觀士多矣未有如卿者必爲台牧賢其勉之賢後至洮州總管

裴俠爲郢州刺史梁竟陵守孫髡鄴城守張建並以郡來附俠見之密謂人口髡目動言肆輕於去就者

也建神情密定當無異心乃馳啓其狀文帝曰裴俠

有鑒深得之矣遣大都督苻貴鎮竟陵而鄴城竟不遣監統及柳仲禮軍至髡廼以郢叛卒如俠言

于翼爲司會中大夫文帝以翼有人倫之鑒皇太子及諸王等相傳以下並委翼選置其所擢用皆民譽也時論僉謂得人

隋劉臻爲左僕射初楊汪問禮於沈重受漢書於臻二人推許之曰吾弗如也錄是知名汪仕至吏部尚

書

牛弘爲吏部尚書所有進用皆稱職吏部侍郎高孝基鑒賞機悟清慎絕倫然爽俊有餘迄似輕薄文帝



多以此疑之惟弘深識其推心委任隋之選舉於斯  
爲最時論彌服弘識度之遠又見李靖爲殿內直長  
重之日李生王佐才也

顧言河東人也博學有才罕所推仰與虞世基相見  
歎曰海內當共推此一人非吾儕所及也世基後至  
金紫光祿大夫

高構字孝基爲吏部侍郎見杜如晦少聰悟美風調  
精彩絕人深器重之每謂人曰此子有應變之材棟  
梁之用又房玄齡年十八射策甲科授羽騎尉較讐  
祕書省孝基見玄齡嗟挹不已謂河東裴矩曰僕閱

人多矣未見此賢必成偉器但憾不覩其縱壑凌霄  
耳

劉炫爲太學博士定州義豐人張行成少師事炫勤  
學不倦炫謂門人曰張子體局方正廊廟材也

張弼大業末爲賊帥李大亮隴西狄道人也好讀書  
有文武才幹爲賊所獲同輩百餘人皆就死弼見而  
異之獨釋與語遂定交於幕下

盧思道爲散騎侍郎封倫舅也封倫少時思道每言  
曰此子智識過人必能致位卿相

薛道衡爲司諫大夫溫彥博之父友也彥博幼聰悟



有口辯涉獵書記初道衡及李綱嘗見彥博兄弟三人咸歎異曰皆有卿相才也

唐劉曇輝孔穎達邑人也穎達年八歲日讀千言未嘗嬉戲曇輝有知人之鑒深奇之穎達後仕爲國子祭酒

岑文本爲中書侍郎馬周爲中書舍人周有機辯善敷奏文本謂所親曰吾見馬周論事多矣援引事類商確古今舉要刪蕪會文切理奇鋒間出高論橫飛聽之靡靡令人忘倦昔之蘇張終賈徒聞斯語今見其人然鳶肩火色騰上必速恐不能久耳

李勣隋末事李密初得黎陽倉就食者數十萬人魏徵高季輔杜正倫郭恪皆客遊其所一見於衆人之中卽加禮敬引之內卧談話忘倦及平武牢獲僞鄭州長史戴胄知其所行能尋卽釋放更加推薦咸至顯達當時稱其有知人之鑒勣後位至司空

李文博有知人之鑒張河幼而警悟文博見而奇之與其結友河後爲相州都督范陽郡公

盧承業爲揚州長史婁師德弱冠進士擢第授江都尉承業奇其才嘗謂之曰吾子台輔之器當以子孫相託豈可以官屬嘗禮行也師德後爲相



朱敬則爲正諫大夫同鳳閣鸞臺平章事雅有知人之鑒凡在品論者後皆如其言及知政事以用人爲先桂州蠻叛薦裴懷左鳳閣舍人缺薦魏知古右史缺薦張思敬則天以爲知人

裴行儉爲吏部侍郎時賞拔蘇味道王劇謂曰二公後當相次掌知均衡之任時李敬玄盛稱王勃楊炯盧瓘隣駱賓王等以示行儉行儉曰士之致遠先器識而後文藝也勃等雖有才名而浮躁炫露豈亨爵祿者哉楊稍似沈靜應至令長餘並緝能令終其後皆如其言

李義琛爲雍州長史蘇珣爲鄠縣尉義琛謂曰鄠縣本多訴公近日遂絕訪聞其繇明公爲其踈理因顧指廳事曰此卽明公座也但憾遲暮所見耳珣後至吏部尚書

桓彥範爲雒州刺史蕭嵩調雒州參軍彥範見之雅重待以殊禮

姚崇爲紫微令蕭嵩爲中書舍人與崔琳王丘齊幹同列咸未之異而崇許其致遠眷之特深獨孤信爲雒州總管孫思邈弱冠善談莊老及百家之說兼好釋典信見而歎之曰此聖童也但憾其器



大適小難爲用也

吳兢仕至相州長史初張鎬風儀魁岸廓落有大志涉獵經史好談王霸大畧少時師事競競甚重之

李華栖筠之族子也栖筠趙郡贊皇人幼孤貧而器度雄遠體貌環傑博覽墳籍無所不通屬文勁迅然本於理道教化性嚴重寡言造次不妄交接故當時高名之士皆敬慕之華有知人之鑒每稱其王佐才初自負器業恥從賓貢隱居於郡共城山下華固勉其應舉一試登進士第

程楚賓者呂譔鄉人也譔蒲州河東人少修整勵志於學早孤家貧不能自賑楚賓家富於財遂娶其女楚賓與子震重其才給其所欲至天寶初舉進士調寧陵尉

杜鴻漸爲宰相杜黃裳升進士宏辭科鴻漸深器重之黃裳後亦爲相

于邵爲禮部侍郎雅知人初山南東道樊澤嘗舉賢良方正至京師一見之謂人曰將相之材也五年澤爲節將又北部郎中崔元幹年近五十始舉進士邵異其文學擢首甲科且曰不十年當掌誥命竟如邵言



裴傲爲金吾將軍時邵說遷吏部侍郎以才幹稱談者或以宰相許之傲語諫議大夫栢載日以鄙夫所度說得禍不久矣且說與史思明父子定君臣之分居劇官掌兵柄亡軀犯順前後百戰於賊庭掠名家子女以爲婢僕者數十人剽盜寶貨不知紀極力屈然後降朝廷宥以不死獲齒班序會無厚顏而又違違求財崇飾第宅附託貴倖以求大用不知愧懼而有德色其可久乎說竟卒於歸州刺史

梁肅爲翰林學士初崔群年未冠舉進士陸贄知貢舉訪於梁肅議其登第有才行者肅曰崔群雖少年他日必至公輔果如其言

韋夏卿爲東都留守留心辟士務得才彥其後位至卿相

高郢爲僕射張仲方之父友也初仲方爲兒童時郢見而奇之曰此子非嘗必爲國器吾獲高位必振發之後郢爲御史大夫首請仲方爲御史

後唐盧質爲張承業管記承業辟馮道爲本院巡官承業重其文章履行甚見待遇時有周玄豹者善人倫鑒與道不洽謂承業曰馮生無前程公不可過用質聞之曰我曾見杜黃裳司空寫真圖道之狀貌酷



類馬將來必副大用玄豹之言不足信也承業尋薦  
爲霸府從事

趙德均明宗鄉人也高行周事明宗嘗與清泰主分  
率牙兵明宗所征無不拱從德均謂明宗曰行周心  
好謹厚必享貴位

陳紹光驍將也鄭仁誨幼事紹光紹光恃勇使酒嘗  
乘醉抽佩劍將刺刃於仁誨左右無不奔避惟仁誨  
端立以俟畧無懼色紹光因擲劍於地謂仁誨曰汝  
有此器度必當享人間富貴及紹光與郡仁誨累爲  
右職

晉盧岳明曆象善知人唐末嘗謂李周曰子奇表方  
頤隆準眉目踈朗身長七尺乃將相之材也河東李  
氏將有天下子宜事之以求富貴周辭以母老而歸  
旣而梁將葛從周拔邢維唐武皇麾兵南下築壘於  
青山口周向背莫決因思岳言乃拔青山寨將張涉  
落武皇賞之補萬黃領軍使

司空圖爲兵部侍郎姚顛少養敦厚靡事容貌任其  
自然流輩未之重惟圖深器之以女妻焉



冊府元龜 卷之八百四十三

冊府元龜

冊府元龜

淮南李嗣京參術

西極文翔鳳訂正

豫章黃國琦較釋

總錄部

八百四十四

守官

勤幹

守官

傳曰守道不如守官又曰見死不更其守蓋夫委質公朝從政王室靖恭爾位職思其優故有專秉彛章恪居官次弓招靡應李法是從聞變難而不移疆臣

冊府元龜 總錄部

卷之八百四十四



以之屈意奉憲令而無撓明主繇是改觀得守器之規絕代庖之咎宜乎寵以異數謂之能臣者哉

欒鍼晉中軍帥欒書子也晉侯及楚子鄭伯戰于鄢

陵有淖於前淖泥也乃皆左右相違於淖違辟也步毅遇

晉厲公欒鍼為右步毅即郟毅欒范以其族夾公行二族強故

在公左右陷于淖欒書將載晉侯鍼曰書退國有大任焉

得專之在君前故子各其父大任謂元帥之職且侵官冒也載公為失

官慢也去將而御失官也離局姦也遠其部曲為離局有三罪焉不

可犯也乃扶公以出於淖

謝息魯孟僖子家臣孟孫從昭公如楚晉人來治杞

田季孫將以成與之成孟氏邑本杞田謝息為孟孫守不可

日人有言曰雖有挈瓶之智守不假器禮也挈瓶一者登一

知為人守器猶知不以借人夫子從君而守臣喪邑夫子謂孟僖子也雖

吾子亦有猜焉言季孫亦將疑我不忠

齊虞人史失姓名景公田于浦浦澤招虞人以弓不進公

使執之辭曰昔我先君之田也旌以招大夫弓以招

士皮冠以招虞人臣不見皮冠故不敢進乃舍之仲

尼曰守道不如守官君招當往道之嘗也非物不進官之制也君子韙之

韙是也

孔子嘗為委吏矣會計當而已矣為乘田矣牛犂苗



壯長而已矣孔子嘗恐貧而祿仕委吏主委積庾舍之吏也不失會計直當其多少而已乘田花園之吏也上六畜之芻牧也牛牟苗壯肥好食令長大而已苗長貌也詩云彼茁者猗位卑不得高言予朝事故但稱職而已

漢胡建字子孟孝武天漢中守軍正丞

南北軍各有正丞置丞而

建未得真官兼守之貧無車馬嘗步與走卒起居所以尉薦走

卒甚得其心尉者自上安下者也薦者舉藉也時監軍御史為姦穿

北軍壘垣以為賈區坐賣日賈為賈物之區也區者小室之名若今小巷屋之類耳

故行士之屋謂之區廬宿衛宮外士稱為區士也建欲誅之乃約其走卒約

也曰我欲與公有所誅吾言取之則取斬之則斬於是當選士馬呂監軍御史與護軍諸較列坐堂皇上

較者諸軍之部較也室無四壁曰皇建從走卒趨至堂皇下拜謁因上

堂走卒皆上建指監御史曰取彼走卒前曳下堂皇

建曰斬之遂斬御史護軍諸較皆愕警不知所以建

亦已有成奏在其懷中遂上奏曰臣聞軍法立武以

威眾誅惡以禁邪今監御史公穿軍垣以求賈利謂公

顯然為之私買賣以與士市不立剛毅之心勇猛之節亡

以帥先士大夫尤失理不公用文史議不至重法黃

帝李法曰獄官名也天文志左角李右角將兵書之法也李者法官之號也總主征伐刑戮之

事也故稱其事也李法壁壘已定穿窬不繇路是謂姦人姦人

者殺窬小賣也臣謹案軍法曰正亡屬將軍將軍有罪已



開言軍正不屬將軍將二千石以下行法焉二千石謂軍中

較尉都尉之屬丞於用法疑丞屬軍正斬御執事不諉上諉累

也言執事者當見法臣謹以斬昧死以聞制曰司

馬法曰國容不入軍軍容不入國何文吏也亦兵書

之名也解在主父偃傳詔言三王或誓於軍中欲民

先成其慮也或誓於軍門之外欲民先意以待事也

慮謂計念也先意欲致民謂先勇志使之意也

不奔建又何疑焉建繇是顯名

符璽郎史失昭帝時殿中嘗有怪一夜群臣相驚霍

光召尚符璽郎恐有變難故郎不肯授光光欲奪之

郎按劍曰臣頭可得璽不可得也光甚義之明日詔

增此郎秩二等衆庶莫不多光

後漢祭遵從光武征河北為軍市令舍中兒犯法遵

格殺之光武怒命收遵時主簿陳副諫曰明公嘗欲

衆軍整齊今遵奉法不避是教令所行也光武乃贊

之以為刺姦將軍謂諸將曰當備祭遵吾舍中兒犯

法尚殺之必不私諸卿也

侯霸為淮平大尹政理有能名及王莽之敗霸保固

守卒全一部

鄧暉字君章為上東城門候光武嘗獵車駕夜還暉



拒關不開帝令從者見而於門問暉曰火明燎遠不受詔帝乃廻從東中門入

東面中門也

何湯爲開陽門候建武十八年夏旱公卿皆暴露請雨雒陽令著車蓋出門湯將衛士鉤令車收案有詔免令官拜湯虎賁中郎將光武嘗歎曰赳赳武夫公侯干城何湯之謂帝又微行夜還湯閉門不納更從中東門入明旦召詣大官賜食諸門候皆奪俸第五倫爲京兆尹閭與主簿時長安鑄錢多姦巧乃署倫爲督鑄錢掾領長安市倫平銓衡正丰斛市無阿枉百姓悅服

晉徐胤爲牟祐軍司馬祐在荊州頗以畋獵廢政嘗欲夜出胤執戟當營門曰將軍都督萬里安可輕脫將軍安危亦國家之安危也胤今日若死此門乃開耳祐改容謝之此後稀出矣

後趙王假爲求昌門候石勒嘗夜微行簡察營衛齎繪帛金銀以貽門者求出求昌門假欲收捕之從者至乃止旦召假以爲振忠都尉爵關內侯後秦王蒲聰爲城門較尉姚興從朝門游於文武苑及昏而還將自平朔門入前驅旣至蒲聰被甲持杖閉門拒之曰今已昏闇奸良不辨有死而已門不可



開興乃迴從朝門而入旦而召滿聰進位二等

宋謝莊爲侍中領前軍將軍武帝出行夜還勅開門莊居守以縈信或虛報不奉旨須墨詔乃開上後因酒讌從容曰卿欲效邳君章耶對曰臣聞蒐巡有度郊祀有節盥於遊畋著之前誠陛下今蒙犯塵露晨往宵歸容遊不逞之徒妄生矯詐臣是以伏須神筆乃敢開門耳

南齊荀伯玉爲太祖冠軍參軍隨太祖還都除奉朝請令伯玉看宅知家事孝武罷廣興還立別宅遣人於大宅掘樹數株伯玉不與馳以聞太祖曰卿執之是也

傅寂之年十七爲州西曹兼並主簿刺史王彧行夜還前驅已至寂之不肯開門曰不奉墨旨或方於車中爲教然後開或歎曰不意邳君章近在閭下卽轉爲主簿

北齊張耀爲尚書右丞文宣曾因近出令耀居守嘗夜還耀不時開門勒兵嚴備帝駐蹕門外久之催迫甚急耀以夜深真僞難辨須火至面識門乃可開於是獨出見帝笑曰卿欲學邳君章也乃使耀前開門然後入深嗟賞之賜與錦采



唐褚遂良爲諫議大夫兼知起居事太宗嘗問曰卿知起居記錄何事大抵人君得觀之否遂良對曰今之起居古左右史書人君言事且記善惡以爲簡誠庶幾人主不爲非法不聞帝王躬自觀史太宗曰朕有不善卿必記之邪遂良曰守道不如守官臣職當載筆君舉必記太宗以爲然

王播爲侍御史德宗貞元末李實爲京兆尹恩寵莫二播嘗遇之通途故事臺府相臨實宜下道避至是實不肯避呵道如故播嘗自臺移牒實怒遂奏播爲三原令

勤幹

傳曰能業其官詩云不懈於位蓋夫明幹勵職受任居方有統理之才資精鍊之用雖復繁於簿領靡厭於官曹政經是勤吏事攸攝幹蠱之謂茲以足稱在公之心於焉是取斯所謂思不出位職思其憂智效一官守不假器敏以爲政行之惟艱者也故以明濟著聞僥勉從事或終日以斂膝或申旦而不寢衆務具舉彊力斯在茲故爲吏者克勵其所守者矣若乃傲當官之譽取辨職之稱雖日無近名蓋亦不信矣冥爲夏司空勤其官事死於水中殷人郊之



孔子為魯季氏史料糧平嘗為司職吏而畜蕃息

趙奢者趙之田部吏也收租稅而平原君家不肯出

趙奢以法治之殺平原君用事者九人

漢蕭何沛人也以文母害為沛主吏掾

害傷也無能傷害之也

秦御史監郡者與從事辨之

何與共事備辨明何素有方略

何乃給

泗水卒史事第一

課最上

秦御史欲入言徵何何固請

得毋行

尹翁歸為平陽市吏是時大將軍霍光秉政諸霍在

平陽奴客持刀兵入市鬪變吏不能禁

變亂也

及翁歸

為市吏莫敢犯者

張世安字子孺少以父任為郎用善書給事尚書

於

書中給事中給供也

精力於職休沐未嘗出

後漢劉虞東海恭王之後也遭世衰亂又與時主疏

遠仕縣為戶曹吏以能治身奉職召為郡吏

虞延陳留東昏人也光武東之雖過小黃高帝母昭

靈后園陵在焉時延為部督郵詔呼引見問園陵之

事延進止從容占拜可觀其陵樹株蘖皆諳其數俎

豆犧牲頗曉其禮帝善之

蓋延初歷郡列掾州從事所在職辦

陳寵辟司徒鮑昱府掾屬專尚交遊以不肯親事為



高寵嘗非之獨勤以物務

魏薛悌字孝威太祖定冀州以悌及東平王國為左

右長史後至中領軍並悉忠貞練事為世吏表

高柔為刺姦令史柔既處法平允又夙夜匪懈至擁

膝抱文書而寢太祖嘗夜微出觀察諸吏見柔哀之

徐解裘覆柔身而去自是辟焉

李勝為滎陽太守河南尹勝前後所為宰守未嘗不

稱職

陳本歷位郡守九卿所在操綱領舉大體能使群下

自盡有統御之才不親小事不讀法律而得廷尉之

稱優於司馬岐等精練文理

蜀李福為江州督揚威將軍入為尚書僕射福為人

精識果銳敏於從政

王離字伯元以幹才顯為督軍從事推法平當代王

祇為犍為太守

李嚴字方正南陽人也少為郡職吏以才幹稱荊州

牧劉表使歷諸郡縣

吳呂岱守吳丞時大帝領會稽太守親斷諸縣倉庫

及囚繫長丞皆見岱處法應問甚稱帝意召署錄事

滕胤當諸葛恪征淮南以胤為都督掌統留事胤白



日接賓客夜省文書或至曉不寐

晉謝晦爲豫州治中從事義熙八年土斷僑流郡縣使晦分判揚豫民戶以平允見稱

陶侃爲荊州刺史侃性聰敏勤於吏職恭而進禮愛好人倫終日斂膝危坐閫外多事千緒萬端罔有遺漏

陳顥字延思仕爲郡督郵簡獲隱匿者三千人爲一州尤最太守劉亨拔爲主簿

宋沈叔任少有幹質初爲揚州主簿高祖太尉參軍吳山陰令治皆有聲

南齊呂安國廣陵人也宋大明末安國以將領見任隱重有幹局爲劉劭所稱

梁宋史仕宋爲郢州治中有稱名職

劉坦齊建元初爲南郡王國嘗侍尋補孱陵令遷南中郎錄事參軍所居以幹濟稱

徐勉爲侍中時王師北伐候驛填委勉參掌軍書劬勞夙夜動經數旬乃一還宅每還群犬驚吠勉歎曰吾憂國忘家至於是若吾亡後亦是傳中一事

後梁沈君公吳興人有幹局美風儀文章典正特爲明帝所重歷中書黃門侍郎御史中丞傳俊少博學



有才幹歷山陰吳建康令金有能名

陳華皎爲吳興都尉錄軍府文帝爲太守穀帛多以委之皎聰慧勤於簿領

殷不佞少立名節好讀書尤長吏術任梁起家爲尚書兵部甚有能幹

後魏崔休爲司徒右長史聰明強濟善斷決教府多事辭訟盈几剖判若流殊無凝滯加之公平清潔甚得時譽

鄭懿涉歷經史善當世事閑雅有治才爲孝文所器遇拜長兼給事黃門侍郎司徒左長史

曹世表字景昇京兆王征以爲從事中郎攝中兵事自當煩劇論者皆稱其能

崔玄伯少有才雋號爲冀州神童苻融牧冀州爲冀州從事管征東記室出總庶事入爲賓友衆務修理處斷無滯苻堅聞而奇之

高謐字安平有文武才度以功臣子召入禁中除中散專典祕閣肅勤不倦太武深重之

李冲位至尚書僕射機敏有巧思北京明堂圓丘太廟及雒都初基安處郊祀新起園寢皆資於冲勤志彊力孜孜無怠且理文簿兼營匠制凡案盈積劄劂



在手初不勞厭也

穆弼為中書舍人轉司州治中別駕歷任有稱又為北鎮都將軍徵拜殿中尚書出鎮涼州所在著稱封興之為瀛冀二州北平府長史所歷有當官之譽陸恭之字季順有操尚累遷鎮南將軍所歷並有聲

績

平嘗為著作郎遷祕書丞時高允為監河關那枯北年陽蝦河東裴宗廣平程駿金城趙元順等為著作位郎雖才學互有短長然俱為稱職金蹕長者允每稱博通經籍無過嘗也

李獎為散騎嘗侍鎮東將軍河南尹獎前後所歷皆以明濟著稱

劉惔歷徐州別駕兗州左軍府長史司空諮議參軍屢為行臺出使所歷皆有當官之稱

崔敬邕性長者有幹用自司徒主簿轉尚書都官郎中所在稱職

房景為步兵校尉領尚書郎齊州中正所歷皆有當官之稱

叔孫隣少聰慧知名稍遷北部尚書有當官之稱郭祚轉中書侍郎遷尚書左丞長兼給事黃門侍郎



清勤在公夙夜匪懈孝文甚知賞之  
穆觀爲左衛將軍管門下中書出納詔命及訪舊事  
未嘗有所遺漏孝文奇之

許惇字季良清識敏速達於從政位司徒主簿以明  
斷見知時人號爲入鐵主簿

北齊司馬子如爲吏部郎中舉清勤平約遷司徒左  
長史兼廷尉卿以平直稱及領御史中丞正色舉察  
爲朝廷所許

李瑱字道璠隴西成紀人涼武昭王嵩之五世孫父  
韶並有重名於魏代瑱有識量釋褐太尉行參軍累  
遷司徒右長史及遷都於鄴留瑱於後監掌府議及  
撤運宮廟材才以明幹見稱累遷驃騎大將軍東徐  
州刺史

白建字彥舉太原陽邑人也初入爲太丞相府騎兵  
曹典執文帳明解書計爲同局所推

日詢闕涉經史清素自持歷官皆有幹局才具治郡  
甚著聲績民吏敬而愛之

叱列長文爲涇州長史雖無他伎能在官以清幹著  
稱

張耀累遷祕書監耀歷事累世奉職恪勤咸見親待



未嘗有過

後周寇雋仕後魏爲司空府功曹叅軍轉主簿時靈太后臨朝減食祿官十分之一造永寧佛寺令雋典之資費巨萬主吏不能欺隱寺成又極壯麗太后寤之除左軍將軍雋素持法嚴自守不具威儀裴俠爲工部中大夫俠嘗遇疾沈頓士友憂之忽聞五鼓便卽驚起顧左右可向府邸所苦因此而瘳晉公護聞之曰裴俠危篤若此而不廢憂公因聞鼓聲疾病遂愈此豈非天祐其勤恪者也裴祥俠之子也性忠謹有理劇才少爲成都令清不

及俠斷決過之

薛善爲汾陰令善幹用彊明一郡稱取太守王巖美之令善兼督六縣事尋爲行臺郎中時欲廣置屯田以供軍費乃除司農少卿領同州夏陽縣二十屯監又於長陽諸屯置鐵冶復令善爲監每月役八千人管造軍器善自督課兼加慰撫甲兵精利而皆忘其苦焉

高賓累遷計部中大夫賓敏於從政果敢能斷決案牘雖繁綽有餘裕

李彥累遷開府儀同三司素多疾而勤於蒞職雖沈



頓枕蓆猶理務不輟遂至於卒  
申徽初爲西魏右僕射賜姓宇文氏徽姓勤至凡所  
居官案牘無大小皆親自省覽以是事無稽滯吏不  
得爲姦後雖歷公卿此志不懈

楊敷爲司本中大夫軍器副監敷明習吏事所在以  
勤察著名每歲奏課居最累獲優賞

裴果魏孝閔時歷眉復二州刺史果性嚴猛能斷決  
抑挫豪右理屈滯牧數州號爲稱職

馮遷少修謹有幹能辟從事魏神龜中刺史楊均引  
爲中兵參軍事轉定襄令尋爲并州水曹參軍所歷

之職咸以勤恪著稱

栢帶韋爲開府儀同三司凡居劇職十有餘年處斷  
無滯官曹清肅

梁昕溫裕有幹能歷官內外咸著聲稱

隋杜臺卿兄彘學業不如臺卿而幹局過之仕至開  
州刺史

趙綽河東人也性質直剛毅在周爲天官府史以恭  
謹恪勤擢授夏官府下士稍以明幹見知

李圓通京兆涇陽人也高祖爲隋國公擢授參軍事  
高祖初少時每讌賓客嘗令圓通監厨性嚴整左右



婢僕咸所敬憚惟世子乳母恃寵輕之賓客未供每有干請圓通不許或輒持去圓通大怒叱厨人撾之數十叫呼之聲徹於閣內僚吏左右相顧失色賓去之後高祖具知之召圓通命坐賜食從此獨善之以爲堪當大任高祖作相賜封懷昌男

張虔雄少有才器秦孝王俊爲秦州總管選爲法曹參軍王嘗親按囚徒虔雄不持狀口對百餘人皆盡事情同輩莫不歎服

元文都性鯁直明辨有器幹仕周爲右侍上士

劉炫河間人也少以聰敏見稱刺史李繪署禮曹從

事以吏幹知名

賀婁子幹字萬壽少驍武知名釋褐司水上士稱爲

疆濟

楊汪爲尚書司勳兵部二曹侍郎秦州總管長史名爲明幹

周羅暉爲幽州刺史俄轉涇州刺史母憂去職未期復起授幽州刺史並有能名

劉子翼爲大理正甚有當時之譽

薛孺爲清陽令襄城掾所經並有惠政

唐戴胄魏郡人也性正直有幹局明習律令尤曉文



簿隋未爲門下錄事納言蘇威黃門侍郎裴矩其禮  
之

劉洎字思遠南郡江陵人也少好讀書性勁躁有幹  
畧

張光輔本燉煌人也少明辨有幹局歷遷司農少卿  
文昌右丞及爲宰相皆有能名

蕭至忠景雲中受晉州刺史明於吏道甚有能名  
崔日用初爲芮城尉則天幸長安備供繇陝州刺史  
宗楚客專以頓事委日用條白物役當煩而省楚客  
深加賞歎繇是擢用新豐尉遷監察御史

顏杲卿以蔭授官性剛直有吏幹開元中爲魏州錄  
事叅軍振舉綱目政稱第一

李彭年有吏才工於剖析有當官之稱

裴耀卿爲濟州刺史玄宗車駕東巡州當大路道里  
綿遠而戶口寡弱耀卿躬自條理科配得所時大駕  
所歷凡十餘州耀卿稱爲知頓之最

蔣沆爲監察御史與兄演溶弟清俱以幹局吏事擅  
能名於時長史韓朝宗裴殉咸以推覆簡勾之任委  
之處事平允剖斷精當動爲群僚楷式

呂謹爲哥舒翰支度判官性謹密勤於職務在使幕



縱無事塊然獨坐不離案牘翰益親之

李麟爲河東太守本道採訪處置使及安祿山反以武臣呂崇貴代之麟還京所歷皆有美稱以謹靖雅正自處

韋倫爲內作使判官時宮內土木之功無虛日內作人吏因緣爲姦倫又躬親閱視省費減倍改大理評事

李若幽性剛正有吏才歷安定扶風錄事參軍皆爲稱職累遷長安令

班宏爲尚書侍郎性勤恪每晨入官署至夕方歸下吏不堪其勞故在職頗以清白勤幹稱

韋元甫少修謹敏於學行初任滑州白馬尉以吏術知名本道採訪使韋陟深器之奏克支使與同幕判官員錫齊名元甫精於簡牘錫詳於訊覆陟推誠任之時人謠曰員推韋狀

劉贊少以資蔭補吏累授鄆縣丞宰相杜鴻漸判官楊炎美之

鄭元累遷刑部尚書性嚴毅有威斷更踐劇任時稱其能

盧士攻山東右族以文儒進性端厚與物無競雅有



令開始爲吏部員外郎甚稱職轉郎中  
後唐張敬詢少事武皇性勤幹時太祖收市甲馬屢  
濟國難尤留意於兵仗敬詢自軍吏至牙較專掌甲  
坊十五年尤稱職

孟鵠本魏州秦吏也莊宗初定魏博選幹吏以計兵  
職鵠爲度支孔目官掌邢洛錢穀司明宗時爲邢洛  
節度使軍賦三分之一屬霸府鵠於調算之間不至  
苛急每事曲意承迎帝心甚德之而度支使孔謙專  
典軍賦而於藩鎮徵督苛急帝嘗切齒及帝卽位鵠  
時爲租庸院勾押擢爲客省副使樞密院承旨當年

爲三司副使

晉周瓌北京晉陽人也少端直善計書自高祖歷數  
鎮用爲腹心累職至牙門都較凡庸調出納咸以委  
瓌經十餘年未嘗以微累見忤帝甚重之  
周邊蔚初仕後唐爲華州記室莊宗之伐蜀大軍出  
於華下時華方闕帥詔令蔚權領軍府事供億軍須  
甚有幹濟之稱



